



So490

KBCI Thuso

Regd.No.19134/88
<http://www.kbc.org.in>
NAI/220/99
No-G-4/Regd.Magazine
/KBCThuso/MNP-81

Kum 57 Ihinna

Lhakao/March 2020



PATHEN MI NGAILUT

APRIL EVENTS

Palm Sunday - 05
Good Friday - 10
Easter Sunday - 12

"Kapa theng, eini pumkhat ihi bang a amaho jong
pumkhat ahitheina ding un, Nangman amahohi hong in"

John. 17:11



PENETANNIAL FELLOWSHIP PLANING COMMITTEE TOUKHOM NA FEBRUARY 27

CENTRE CHURCH B. VENGNOM NEW CHURCH BUILDING



**Elijah Prayer Mount Gothol mun a
Electricity Ihunthei jeh a
Mission Board in kipana MAICHAM
15 FEBRUARY 2020
nin ana sem un ahi.**



CONTENTS

THUMAKAI HO

"LHAGAOVA PUMKHAT HINA DINGIN KIHABOL UN"/Editorial	2
KBCKiphudoh/KBC THUCHINBU	4
Kipumkhatna/Rev.Dr. M. Thongkhosei Haokip	7
PAKAIYA KISEL APHAIJOI/Thilphabol	12
Mission Column	18
Men Column	20
Women Column	21
Youth Column	21
Literature& Music Column	22
Reports	23
Hetna belap	25
Advertisement	31

EDITORIAL BOARD

<i>Chairman</i>	: Rev. Tonglet Haokip, President KBC
<i>Editor</i>	: Dr. M. Thongkhosei Haokip, General Secretary
<i>Joint Editor</i>	: Rev. Onkho Haokip
<i>Contributing Editors</i>	: 1. Rev. Thongkholun Touthang 2. Rev. Lamkeng Lhouvum 3. Rev. Tongmang Haokip 4. Pi Lhingbem Haokip 5. Rev. Lunkhosei Tuboi 6. Rev. T. Thangkhosei Haokip
<i>Design & Layout</i>	– Pu S. Lenboi Haokip
<i>Circular Manager</i>	– Pi Vahboi Baite
<i>Recorder</i>	– Ms. Nemhoichong Haokip

THUSO LAHMAN

Church/Organisation/ DepartmentRs. 300/-
Individual Rs. 200/- (Post a Rs. 250/-)

Indian Overseas Bank, Imphal Branch
A/c No. 073201000000350 IFSC No. IOBA0000732

The General Secretary,
Kuki Baptist Convention,
Opp. DM College, Imphal 795001, Manipur
email: kbcindia@rediffmail.com

Advertisement bolnom hon Mobile No. 70895979446 Contact thei.
Circulation to kisai lam Mobile No. 9862107393 bol ding.

Editorial...



"LHAGAOVA PUMKHAT HINA DINGIN KIHABOL UN"

Editorial

"Chuti ahijeh chun a chu Pakaiya sohchang keima naheng uva kahung tao ahi. Nangho naki kounau toh kitoh in chonun; chonnem-na bukimin, lungnem toh, thohhattoh thon chonun; ngailutna in khat le khat kingai themun. Chamna in kikanun Lhagaova pumkhat hina dingin kihabolun". (Ephesia 4:3)

Amasatah in muntina um Kuki Christian chate jouse ahideh a KBC member ho jouse chungu i Pakaiyu Jesu Christa minin salaam kahinpe cheh uve. Tulha thupi chu "Kipumkhatna" ahi toh kilhonin, i houbung leh lhangpi hinkhoa sahphat ding tampi lah a pumkhat hina ding hi jong po-imo tah khat in kagelin ahi. Hiche article ah hin Kuki Christiante lah a adeh a houbung sunga kipumkhatna tohguon thudol itahlang nomun ahiye.

Kipumkhatna hi Pathen thilpeh (gift) le toh ding khat (task) ahi. Pathen milungset le khotona jalla manbeiya eipeh u chu hiche kipumkhatna hi ahi. Ama le mihemte kipumkhat theina dinga achapa changkhat seh chu ahinpeh ahi. Pakai Jesu amatah chu vannoiya thilpeh lenpen ahin, mimal hinkho hihen jalhang hinkho hileh kipah tah a

ikisan diu ahi. Pakai Christa vanga namchuom khenna umtalou, Juda le Greek mi kibung khenna beita, soh le sohlou umtalou, chule numei le pasal jong aumtapon, ibonchauva pumkhat ihu ahitai (Gal.3:28; Col.3:11).

Ahin, hichehi mihem toh ding jong umda lou ahi. Eihon iboldiu chu ahile ikihabol uva, kipumkhat na hi ilah uva umsa a pilhinsah ngai ahi. Christian ihivang uva ikah uva kibung khenna hi bei jeng deh dou ahi. Tekahna a Christian kiloikhomna hoa jong nam le nam kithetna, phung le chang kivetna, numei le pasal a kinbolna kikh-ehsahna, anei le aneilou tihoa kibung khenna umda lou ahi. Hijong le hiche hohi Christa thuhil dung juiya ol ola suhtoh le bolt oh ding hi eiho toh ding eikipeu ahi, imacha lolouva achama suhdihsa a um hilou ahi.

Kipumkhatna daltan tampi aumin, hiho lah a chu – eima kichang ngailut (selfishness), kiletsah/kihoitho sah (pride) a midang toh kivop nomlou, lamkai thu ngainom louva eima le ihoubung dingbou gelna, kisel cheh chuh a thil bolna (not being transparent), eima gela adihbou chepi ding dei (midanghon adih helou dana gelna), chule adang dang ahivu. Hichengho jona (overcome) ibol thei uva ahile kipumkhatna chu hung um ding ahitai.

Hiti chu ahung hiteng leh solchah Paul in iPa-kaiyu Jesu Christa minna pumkhat hina dia ana sut chu eiho hinkhoa ibulhin sah diu ahin, Pathen lunglam bol ihidiu ahiye. Pathenin asim jouse chungu kipumkhat chehna dinga thanop na leh pan la dingin vang boh jing taken.

Kuki Baptist Convention (KBC) Kiphudoh

KBC THUCHINBU

ARTICLE

Kuki Baptist Convention (KBC) hi 1950-a anakiphutdoh Kuki Baptist Association (KBA) le 1955 kum'a anakiphutdoh North Eastern Kuki Baptist Association Manipur (NEKBAM) kigom khom'a 1958 March 16 nia Tujangvaichong kho/Houbung'a kiphutdoh ahi. KBC kisem doh theina chu Council of Baptist Churches, North East India (CBCNEI) a Dr. D.J. Duffy, Eastern Theological College Jorhat (ETC) a ana um pa'n CBCNEI Executive Committee-a motion khat ana pohdoh'a CBCNEI sung'a um houbung'ho chu amaho leh amaho kipoh tup theina ding'a REGIONAL/STATE CONVENTION ti lou'a jong pao len dom leh mi tamho chu khoppi (Association) khat'a Baptist member 2,000 cheng nei thei cheh khoppi 5 geiya semdoh thei gamhop nei theiho jong State Convention hilouva Language (Pao) Convention bolsah ding aphai atileh member hon jong pha asah-uva kilolna aneiyu ahi.

Rev. Seikholet Singson chu MBC Secretary jong chule CBCNEI Executive member ahipet tah ahijeh'a phat kijen (chance pha) tah chu ahin lah'a KBA leh NEKBAM gopkhom'a eimi pao khat thoho kigop'a Convention khat semdohna ding'a pan ahinlah'a KBA Lamkaiho leh NEKBAM Lamkaihon kikhopna anei uva akihoutoh diu adeisahna thu chu alang alang'a hetsahna ana nei ahi. Hiche bang chun KBA Lamkaiho Kangchup Bungla (Inspection Bungalow) mun'a ana kikhom un chule NEKBAM langho jong Zalenbung Baptist Church'a ana kikhom uva chujouva alang alang'a Lamkaiho le thalheng hon khoppi (Association) teni kigop'a

CONVENTION semdoh ding kinoptona ahin neigel cheh jeh uva hichea kon achu Lamkaiho le thalheng'ho hung kinoptouva Tujangvaichong Baptist Church'a March 15-16, 1958 a KUKI BAPTIST CONVENTION MANIPUR a hung kisemdoh ahi. Hiche KBC chu Association 7 a ahin hop uva Association khat cheh chu DERECTOR khat cheh lamkaina'a kivaihom ana hiuve. Noiya hin Khoppi minho le lamkaiho min aban neiyin akisunne. Hiche KBC kiphu dohna dia Tujangvaichong kikhopna'a lamkaiho chu:

1. Meeting Chairman - Pu Lalkhokhup Misao
2. Recording Secretary - Pu Lhuntong Touthang

3. Convention Proterm President - Pu T. Lunkim
4. Proterm Secretary - Pu S.T. Mangkho anahiuve.

May 22-26, 1958 chun Tongkoi Houbung mun'a KBA leh NEK-BAM Thilkeo jouse chu KBC pehdohna ding kilolna ana nei un chule KBC Constitution Drafting Committee jong ana semdoh un ahi. Hiche Constitution Draft kibol KIVAI POHNA DANPI chu Imphal Christian Centre Church mun'a October 24, 1958 nia Houbung thalheng mi 400 val'in kitoh del'a phatsahna ana nei utoh kilhon'a noi'a chengse hi KBC lamkai masapen ding'a kilhengdohho anahiuve:

1. Pu Sutkai Chongloi, President,
2. Pu Tongkhojang Lunkim, Executive Secretary (Lo bei)
3. Pu Mangkho Thomsong, Treasurer (Lobei)
4. Paokhosem Kholhou, Clerk
5. Tongkhojam Baite, ChowKidar

Amaho chengse chu Motbung Center a ana um un Convention natoh kituptah in ana pan tauvin ahi.

ASSOCIATION sagi a lamkaiho chu:

1. Gunjil Area Kuki Baptist Association (GAKBA) - Pu Sutkai Chongloi
2. Twilong/Twilang Area Baptist Association (TAKBA) - Pu Ngamkhoneh Kipgen
3. Lhumlam Kuki Baptist Association (LKBA) - Pu Paokhosem Kholhou

4. Lonpi Area Kuki Baptist Association (LAKBA) - Pu Solomon Vaiphei
5. Phaicham Area Kuki Baptist Association (PAKBA) - Pu Lalkhosei Kipgen
6. Chahsat Area Kuki Baptist Association (CAKBAM) - Pu Lhuntong Touthang
7. Ayapurel Kuki Baptist Association (AYAKBAM) - Pu Ngamjathang

Ahin Pu Sutkai Chongloi vangset umtah'a kum khat jong Convention po man louva ahung thi phat in Pu Dongkthothang Singson, KBC Vice President pan 1959 KBC Assembly conduct abol'in ahi. Hiche ban chun KBC President anina in Rev. Seikholet Singson MBC Executive Secretary chu Honorarium din akilheng doh in ahi. 1960 apat chun President athum Ihinna din Pu Sokhup Lhouvum Honorarium President in akilheng doh in ahi. KBC Assembly masapen chu Keithelmanbi Ex-Servicemen Colony-a March 5-8 1959 in akimang in ahi. Assembly masapen achun CBC-NEI-a kon Pu Rev. M. Sevino leh Pu Rev. Gilbert Marak, Nagaland KBA-a kon in Pastor Chungkhosei le Evangelist Khaikhojang, Churachandpur NEIGM-a konin Pu S.T. Henpu leh Pu Khupkho in ana op un ahi. Hiche Assembly a chun Kuki Christian Council (KCC) phudoh ana ahin Kuki Baptist Convention (KBC) CBCNEI phatsahna bang in Pao (Language) khat tho namkhat hina jal in Convention in aung kisemdoh in ahi.

Hichea kon chun Motbung chu Administrative (kivai pohna) Office in ana kimang in chule PHAICHAM (Yaingangpokpi) CENTRE chu Vernacular Bible School in ana kimang e. PHAICHAM CENTRE- Ngulhao Memorial Bible School achun Pu Henkhosei Lhangum, Head Master, Pi Phalkhokim leh Pi Lamkhoneng Lhouvum Assistant Teacher in ana pang uve.

1962 kumin Director ahung kisubeijin Association khat chu Supt/Pastor khat cheh ana kipo-sah e. KBC Executive Council member jong Association dungjujin ana umin, tua Pastor kitihon jong hi Evangelist in ana kimin vouve. 1978 kum'a kipat in Association a kivaipohna ahung kikhel toh kilhon in Superintendent Pastor jong akisubei jin Gambih joh in kivaipohna anaumtai.

Gambih jousea Pastor khat cheh vetsuina, Pastorate kivaipohna ahung kichepi tuni chan in chena lhongpi in akinei jing nalai in ahi.

KBC in ahung kiphudoh apat in Convention sukha thei le sulhu thei boina sang tah tah jong ahin kimaitopi jing in ahi. Hijeng jong- gleh Pathen in pu le pi te taona ana san a KBC ana phungvuh jeh 2019 KBC Statistic dungjui in tule tua KBC sung'a houbung 300 aum in, inbul 9797 aum in, Houbung mihem 52,813 aum in chule Baptized member 30,172 aum in ahi. KBC houbungho le mimalho in KBC angailutnau jong asang jing in ahi. Pathen KBC phung vuh jing henlang phatthei boh jing taken. Chule loupinale choi'atna abon cha'n Pathen chang jing jeng taken.

~KBC Thuchinbu.

HET'A PHA

2019 KBC Statistic dungjui in tule tua KBC sung'a

Houbung	-	300
Inbul	-	9797
Houbung mi	-	52,813
Baptized member-		30,172

Kipumkhatna

Rev.Dr. M. Thongkhosei Haokip
General Secretary

Sermon

Vetan, sopi le sopi kipum khat a achen khom teng iti phat a pha lung lhai um hitam! Luchunga thao mantam kinua khamul geiya jolsuh jeng tobang, Aaron khamul geiya jolsuh peh a asangkhol chol ngongkoi geiya jolsuh bep ahi! (Psalms 133:1,2).

Chule keima vannoiya hi kaum lou ding ahitai, amaho vang hi vannoiya aumna lai uve, chule keima nahenga hung ding kahitai. Ka-pa theng, eini pumkhat ihi banga amaho jong pumkhat ahitheina dingun, nangman amaho hi hongin... Amaho chu pumkhat ahina ding uva, Pa, keima nangma sol kahi hi vannoi miten atahsan theine dinguva nangma keiya nauma keima nanga kaum banga hi, amaho jong einia aum theine dinga katao ahi" (John 17:11,21).

Chuti ahijeh a chu Pakaiya sohchang keima naheng uva kahung tao ahi. Nangho naki kounau toh kitoh in chonun; chonnemna bukimin, lungnem toh, thohhattoh thon chonun; ngailutna in khat le khat kingai themun. Chamna in kikanun Lhagaova pumkhat hina dingin kihabolun. Tipum khat ahin chule Lhagao khat ahi; hiche banga chu nakikouvu jong chu kinepna khat a kikou nahiue; Pakai khat, tahsan khat, baptize chan khat ahi. Chule mi jouse Pa le Pathen khat she bou ahi; Ama imajouse chung a hin hoima jousea um ahi, chule lungsung jousea um ahi (Ephesia 4:3-6).

KBC Thusim Chomlam:

Kuki Baptist Convention in Kum thupi ineiyu chung chonin lhaseh a thupi chuom chuom ineiyu ahitoh kilhonin tulhahi "Kipumkhatna" ti ahi. Ajeh chu kipumkhatna jalla KBC ana kiphudohna lha chu ahi. Tukum jong KBC kiphudohna nikho (16th March, 1958) kum 62 lh-inna mang dingin igaldot cheh tauve. Anikhotah chu Pakai nikho ahikhah lou jeh chun aki-

naipipen nisim 15 March (Sunday) nikho hi man a, thilto inei houhi genthei hahsa kithopina a che ding ti ahiye. Kum tampi ihin manu chu ahivangin, hitia KBC kiphudohna geldohna le khohsah tah a iman beh louvun akihei. Tukum hi eima houbung cheh a hiche nikho phatah a program jong ikisem uva, phat danga anikho thilto maimai hil-ouva program jong special tah a

ibol uva, KBC kinbolna ho dinga atuma taona nikhoa iman diuvin jong hetsah na le tiemna ahung kineiye.

Ihetmau bangun, Kuki holah a Christian/Baptist hina hi 1914 lama houbung ana kiphutdoh hita jong le kum phabep jou ti-chu 16th March 1958 nia chuche laiya ana um KBA (Motbung centre) le NEKBAM (Phaicham centre) chu anakigom khoma Kuki Baptist Convention tia hung kiphutdoh ahi.

Ahin, kum phabep ache nungin hiche kiminhpah teni hi pao (language) jeh le nei-le-nga (property) jeh hin akisubei tasa KBA le NEKBAM anung chohing kit un, amasa chu tuhin TBA asoh in, anukhah jo chu Ch.BA (tua CBCA atiu) ahung soh doh kit in, amani chun KBC akisubei tai ana tilhone. Dan dungjuia i vet le adih lhez jeng chu anahie.

Ahin, akisubeiya asei lhon pen chu kidang tah in Manipur a Kuki chate lah a houbung lenpen le amachaalpen ahung hitan, Pathen thil kidang natohna ahito kilhonin Ama chu loupina le choi-atna chang jing taken! Labolpa'n "Insa hon adeimouva apaidoh sau song chu In ninga songpi khomdet penin apang tai. Hiche hi Pakai thilbol ahin, kamit vet uvin akidang behseh jenge" (Pss.118:22,23) ati hi adih tangeiyin ahi. "Eiho din Pakaiyin thil nasatah tah abolin ikipah tauve" (Pss.126:3).

Ipi jeh pena aumtalouva kisei chu tunia hiche dinmuna ium theiyu ham ti hi gelkhop set thei ahi. Ajeh adang tampi umjong le Pathen lungdeiya akiphu jeh jong hidingin tahsan aume. Chule, Ajeh chu, KBC hi phung-le-chang le thildanga kiphut louva Pakai Jesu thiempu hina a leiset adalhah kona ana taona: "Kapa Theng, eini pumkhat ihibanga amaho jong pumkhat ahina ding uva katao ahi" (John 17:11,21) ti bulhit sah ding chu ideiyu toh kilhonna ithupi (theme) a jong ipansah u ahi. Hiche toh kilhonna i motto u chu: Kipumkhatna (Unity), Pathen thu lhangsapna (Mission), chule Lhacha kin bolna (Service) ti ahiuve.

Kipumkhatna dingin mun jousea KBC makaina in pan akilan'n, thilchom chom le Christian kibahpi Baptist hihen hilou jong le tohkhomna theitheiya akitong khomin, CBCNEI-MBC, KCLF, AMCO, chule adang dang jong ahiuve. Mission natoh na in India polam le sunglama jochanin kipana thupha phuondohna akinei-yin, missionary ho le evangelist tampi akigoie. Nepal a kum 40 jen mission na inatongun, aban ah Burma (Myanmar) a, tulaiyin China le Laos chule Cambodia ahiuve. India sunglama Manipur a Meilhei te le Nepali/Gurkhaliho, Assam, Arunachal Pradesh, Tripura, chule North India (Ludhiana, Punjab) gama itoh laiye ahi. Lhacha kinbolna

ah hin meithai-chaga khohsah ding, genthei-hahsaho kithopi ding, athi-amang khohsah ding tia Daanpia jong ineiyu ahitoh kilhonna, hiche nikhoa taona le thilto inei houhi manchah ding ti ahin, thupitah a igeldiu angaiye.

Sermon thumakai

Hiche toh kilhonna Kipumkhatna thudol sermon/article khat hi anina issue a itahdoh nomun ahi. Kipumkhatna thudola sei ding le jildoh ding tampi umjong le hiche issue ah hin Pakai Jesu thempu len ahina a ataona le solchah Paul in kipumkhatna thudol toh kisai ho bou ana sei tadiu hite. Mun jouse le mi jouse kipumkhat tah a achenkhom dinguihi Pathen lungdei ahi. Kipumkhatna kiti hi vannoi leiset in angaichat pen loikhat chu ahi. Ahin mun jousea kibung khenna, loitum semna, kipum khat louna lunggel le natoh, lungngaituo, thuseina hojeh in boina tampi ikiloi den un ahi. Ikipum khat u angaiye. John 17:11,21 na ah, iPakaiyu Jesu Christa chun ama nungjuiho (eiho dinga jong) ataona chu: "Ka-pa theng, eini pumkhat ihi banga amaho jong pumkhat ahitheina dingun ..." ati.

Chule solchah Paul in, 'Lhaova pumkhat hina dingin kihabol un kihabol un' atie. Hijeh a chu Houbung ahung umlona khat chu ahile mijouse lhagao, lungthima, tahsa a, imalam jousea

Christian hinkho a pumpia kipumkhat sahna dinga kithopi ding chu ahi. John lekhabu chun kipumkhatna aumlou akhothan iPakaiyu Christa'n leiset adalbah masanga ataona a kon chun imu uvin ahi. Solchah Paul in Ephesia mite henga kipumkhat lou akhodan aseiyeh. Kipumkhat kiti chu ipi ham? Ichan geiya ikipumkhat tah uvem ti ikihet theiyu ham?

Kipumkhatna hilouho

Kipumkhatna het theina dingin itobang ho chu kipumkhatna hilou ham ti ana ve masaute.

Khatna, Kipumkhatna hi tahsa mihem semthu kiloikhomna ho kipunkhomna (organizational unity) chu ahipoi. Christian Organisation ho phudoh jong ahipoi.

Nina ah, Kipumkhat na kitihi mi jouse kibahna (uniformity) ahideh poi. Miho lunggel le natoh jouse kibang jou kei ding kiti hi ahithe lou thil khat chu ahi.

Athumna ah, Kipumkhatna kitihi thuhil (doctrine) chungchanga mi jouse kito chet ding tina jong ahideh kit poi. Sapaova'we agree to disagree' atiu banga midang lunggel achom ahina hetpeh le sanpeh chu ahi.

Achuti le Kipumkhatna chu ipi hitantem?

Khatna, kipumkhatna hi Pathen a kon chule Ama alailunga umna chu ahi. Pa le Chapa khat ahina

kipumkhatna chu ahi. Hiche jeh a chu Pathen le mihem kah jeng-seh hilouva mihem le mihem kah jenga jong kipumkhat theine chu ahi.

Nina ah, Kipumkhatna kitihil lunggel kibah louna lah a kihet themna jalla pumkhatna (unity in diversity) ahi. Solchah Paul in, thilpeh jat chom chom (different gifts) aseiyin, khat le khat kipom-tona chu ahi. Insung khat a minu, mipa, chule achateho jong thisan chedola a kibanglou ahivanga insung khat ahitobang ahi.

Thumna, thuhil (doctrine) alhangpia kipompeh tona chu ahi. Thuhil abonin hetna kibang hih jong le kijatona le kingaikham tona ahi. Masang laiya houbung Pa-te (Church father) holah a a khat St. Augustine kitipa thusei: "in essentials unity, in non-essentials liberty, and in all things charity" hi geldoh thei tah khat ahi. Aman aseina hi thuil jong hi jat thumin ahin khenin, jat khat chu angaicha tahbeh ho – tekahna a huhhingna thudol hi compromise bolthei hilou jeh a chu essential ahi. Ahin adang ho chu ngaicha ahivanga cham-lhatna kipehtona angai ahin, thil jousea kingailutna (charity) ngai ahi atie.

Kipumkhatna hi lpi jeh a Ngaicha hintem?

Kipumkhatna umding dei jalla Christa thi ahin, chule vannoiya Ama thu lhangsapna dinga poimo ahi.

Khatna, Christian kipumkhatna hi apoimo dan chu Christa hiche ding jeh a thi ahi. [HYPERLINK "javascript:%7b%7d" Ephesians 2:13-16.](#) Christa houbung khat semdohna dingin masanga kimelma a anaum Juda ho le gentile ho kah a kibung khen-na chu Cross a suhkeh ahitai. Christian kichenna a kimang thucheng, "Pathenin agopsa chu mihemin sukhen hih hen" atibangin, Christa chu houbung kipumkhat dinga thi ahitoh Il-honna eihon jong kipumkhatna itudet jing diu apoimo lheh e.

Nina, Vannoi miten atahsan theina dinguva poimo tah khat chu ahi. Solchah Paul khanga chu Juda mite le gentile te kibung khenna chu ana len tah ahi. Christa chun hiche nam kidou teni cross a agopkhom a houbung khat aso chun vannoiya thil kidang tah asuodoh ahi. Akikhetbeh niding jan a chu anungjuiho pumkhat ahina dinga thempu hina a taovah ahi. Miho mutheiya kipumkhat ihi-uhin vannoi mite henga Christa iphuondohnau ahi.

Thumna, Thahatna le kivenbitna dinga poimo tah chu ahi. Tulai hi vannoi hihen India sung hi-jong le vaipoho kikkel jing toh kilhonna Chrstian ho le houlama neochahchaho (minority religions) dingin pankhom lou ahithe poi. Thuchih lui khat in ana sei, "United we stand, divided we fall" (Ikipumkhat u le

idin diu, ikibungkhen u le ilhah/ kheh diu"atihi itih phat hihen koima jat lah hijong le adih jing khat chu ahi.

Vannoi miten atahsan theina diuva Christian te iti ikipumkhat thei diu ham?

Khatna, Kipumkhatna hi Pathen thilpeh (gift) ahin kipah tah a san ding ahi. Pathen milungset le khotona jalla manbeiya eipeh u chu hiche kipumkhatna hi ahi. Ama le mihemte kipumkhat theina dinga achapa changkhat seh chu ahinpeh ahi. Pakai Jesu amatah chu vannoiya thilpeh lenpen ahin, mimal hinkho hihen jalhang hinkho hileh kipah tah a ikisan diu ahi. Pakai Christa vanga namchuom khenna umtalou, Juda le Greek mi kibung khenna beita, soh le sohlou umtalou, chule numei le pasal jong aumtapon, ibonchauva pumkhat ihu ahitai (Gal.3:28; Col.3:11).

Nina, Kipumkhatna hi bolding natoh khat ahi. Kipumkhatna hi thilpeh ahinah vangin, hichehi mihem toh ding jong umda lou ahi. Eihon iboldiu chu ahile ikihabol uva, kipumkhat na hi ilah uva umsa a pilhinsah ngai ahi. Christian ihivang uva ikah uva kibung khenna hi bei jeng deh dou ahi. Tekahna a Christian kiloiikhomna hoa jong nam le nam kithetna, phung le chang kivetna, numei le pasal a kinbolna kikh-ehsahna, anei le aneilou tihoa kibung khenna umda lou ahi. Hi-

jong le hiche hohi Christa thuhil dung juiya ol ola suhtoh le boltoh ding hi eiho toh ding eikipeu ahi, imacha lolouva achama suhdihsa a um hilou ahi Galatians 3:28; Col. 3:10-11)

Thumna, Kipumkhat thei louna-ho hetdoh a jo ding (overcome) ngaituo ding ahi. Satan in Christian te pumkhat ahiding adeilou ahin, hiche umlouna tei dinga nasatah a pan alah ahi. Kipumkhatna daltan tampi aumin, hiho lah a chu – eima kichang ngailut (selfishness), kiletsah/ kihoitho sah (pride) a midang toh kivop nomlou, lamkai thu ngainom louva eima le ihoubung dingbou gelna, kisel cheh chuh a thil bolna (not being transparent), eima gela adihbou chepi ding dei (midanghon adih helou dana gelna), chule adang dang ahivu. Hichengho jona (overcome) ibol thei uva ahile kipumkhatna chu hung um ding ahitai.

Thukhum khana

Achainan, mun jouse le mi jouse kipumkhat tah a achenkhom dinguihi Pathen lungdei ahi.. Kipumkhatna hilou ho chu, khatna, tahsa mihem semthu kiloiikhomna ho kipunkhomna (organizational unity) chu ahipoi. Nina, mi jouse kibahsah na (uniformity) ahideh poi. Chule athumna ah, thuhil (doctrine) chungchanga mi jouse kito chet ding tina jong ahideh kit poi. Kipumkhatna hi Pathen a kon chule Ama alailunga umna chu

ahi. Pa le Chapa khat ahibanga mihemho jong ahidingu adei ahi. Nina ah, Kipumkhatna kitihi lunggel kibanglou hijong le kihet themna jalla pumkhatna (unity in diversity) ahi. Thumna, thuhil (doctrine) alhangpia abonin hetna kibang hih jong le kijatona le kingaikham tona ahi.

Kipumkhatna apoimo je dan chu, Christa hiche ding jeh a thi ahi. Chule, vannoi miten atahsan theina dinguva poimo tah khat chu ahi. Solchah Paul khanga Juda mite le gentile te kibung khenna le nam kidou teni cross a agopkhom a houbung khat aso ahi. Chukitle, thahatna le kivenbitna dinga poimo tah

chu ahi. Kipumkhatna hi thilpeh (gift) chule bolding (task) khat ahin, Pathen thilpeh nasapen loi chu ahin, ahivanga eihon jong phatah a venbit ngai ahi. Hiche umna thei dinga kibung khenna theiho jona ineiyu ngai ahi. Kipumkhatna dinga Christa'n eikouvu ahin, thempu ahina a pumkhat ihitheina dinguva taona eimanpeh nau le solchah Paul in iPakaiyu Jesu Christa minna pumkhat hina dia ana sut chu eima changval, insung chule houbung sunga bulhitsah dingin kigo cheh u hite. Lungluttah a sim le ngaiho jouse Pathenin phatthei boh tauhen.

WORKING WOMEN HOSTEL KBC 2019 SUNGA PACHANNA NEIHO

1. Vahneilhing Haokip MA English Hons. (2nd)
2. Lhingchoihoi Haokip MA English Hons. (2nd)
3. Veineilam Vaiphei MA Sociology Hons. (1st)
4. hingneikim Haokip LLB
5. Lhaichingthem Haokip BA English Hons(5th Position)
6. Nemneikim Guite B.Sc. Botany Hons (2nd)
7. Kimdeithem Kipgen BA Phylosophy Hons. (2nd)
8. Nengneingai Touthang BA Pol.Sc. (2nd)
9. Lhingthemhoi Vaiphei CBSE XII Arts (1st)
10. Nengboithem Haokip CBSE XII Arts (1st)
11. Tabitha Vaiphei CBSE - X (1st)
12. Nengneichong Haokip B. Sc. (Top 10th)

Warden, Working Women Hostel, KBC Imphal.

MIHEM'A KI NGAI SANG IN PAKAIYA KISEL APHAJJOI

Psalms 118:8-9

Sermon

"Mihem'a kingai sang'a Pakaiya kisel aphajoi. Leng chapate-a kingai sang'a Pakaiya kisel aphajoi."

Mihem in eipa chat-a eikipapi tengleh akikipah cheh in ahi. Ijinu in eihin pa chat'a, iloi le gol cheng in eihin seiphat'a, itohkhompiho in eihin kithang atpi teng leh kipa le thanom aum jing in ahi. Hicheho jeh chun inatohna mun a akimachal chom chom ji'n, Pathen in amaho tobang ahin manchah jeh in akikitilkhohu ji'n ahi. Ahivang in, mihem in na pachat le na hin bol dan dan'a natong le hinkho mang cha na hileh, na hina, na loupina, na gunna le na manlutnaho jouse hi min nahin pachat tengleh bou umdoh ding ahi. Mihemte seiphat le pachat chule lamhil bouseh'a hinkho lamlahna lampi hi bailam cha um ahi. Min na pachat lou leh na dihlou, min na seiphat lou leh na mitmo, min na hin seiphat louleh ima bol theilou dan'a na um doh jeng thei ahi. Hitia chu na um jingleh na hina, na gunna le na bol

theinaho jouse chu miho seiphat le seiphat louva kingam ding ahitai. Hiteng chuleh amaho kipa pana na na toh ngai tantin, amaho seiphat phatna ding bouva na natoh ngai tantin, amaho lamhil hil banga na natoh ngai tantin, mi seiphat ding deicha gunset a hinkho na man ding ahitai.

Hiteng chuleh na lhai lhaina-a na thi dehdeh ding, mihon maiphave, ahilouleh mi thu thua nung nahin ti dingu ahitai. Adihlou chu – Pathen akon na

mu ding pachatnaho chu mihem akon mu ding na kinep jeh ahi. Na hina le na gunna hi mi dang akon hung ahipon, amahon na peh u ahipon, na sempa akon bou ahi. Mi chung'a na kingai leh na lunglha ding ahi. Mihem in na hin suh nem ding ahi. Mihem na ngaichat pettah leh na mu lou thei ahi. Mi dang natoh le na toh lou chule seiphat le seiphat lou chun nangma hinna asuhboi louhel ahi. Mihon na hin panpinau le na hinpanpi lounau chun Pathen in na hinkhoa bidoi

chu asutang thei pon ahi. Pathen in ahinna hu chu nangma sung'a ahailut ahitai. Pathen chun na lungset jing'a, na panpi jingsa ahi. Mihemho seiphat le seiphat lou chule tosot le tosot louvin ipi nahi kiphotchen go hih inlang, nang le nang kiphochen in. Midang in na tilkhon lou maithei ahin, nang le nang kitilkhon in. Mihem ten manlutah a na gel lou maithei u ahin, nang le nang in na mantam dan kihet them in. Keima hi Hatchungnung Pathen cha chu ka hi, keima hi Pathen lungsetna chang dimset chu ka hi, keima hi Pathen thilsem lah a ahoipen ka hi ti'n kilhamon in. Nang le nang na hina na kihetna, na kiphotchen tengleh Pathen na houdan le Pathen toh na ki guijop dan hoi cheh ding ahi.

Midang'a na kingai jingleh, ngai-chat na nei jing ding, na pohgih hahsa jing ding, na hinkho jong Pathen deilam hilouva miho deilam'a man ding bou na nop ding ahi. Na insung mite, na loi le na golho injong ama ama natoh le boipi ding cheh anei cheh u ahi, nang na hung khohsah jing kei ding'u thil ahipoi. Nang hinkhoa ahung kikum jing kei uleh nang ding'a neona ahin chule Pathen mit vet ding'a jong adihlou ahi. Amaho chu nang kipa jing keina ding'a mopo ahipouve. Amaho chu nang tilkhon jingkei

ding'a mopo ahipouve. Amaho chung'a chun amaho kin tilou nang jal in pohgih le toh ding koibe peh hih in. Na hahsatna jouse le mi jouse thu aning akah jouse midang koma sei jing gunset ding'a um nahipoi. Chusang in na hina, na gunna, na kipana le na lampi jouse chu na sempa Pathen akon in kisan jo'n. Mihemho pachat le seiphat jeh a hinkho na man leh, tua na seiphaho chun alungthim u ahinkhel uva na hin seiphat lou teng uleh na nasah ding ahi. Ahinlah Pathen koma na che tengleh na kipana chu koimacha in na lahpeh thei tahlou ding ahi.

Min ipi sei jongleh na suhboi tah lou ding ahi. Chule na sempa Pathen chun na pen masang apat, na pumchang keiya deisahna, photchenna le khutsanna aneisa ahitai. Na tohkhompio ahin, na tohna munna na lamkaiho ahim koi hijongleh na hin pachat lou uleh, hiche pachatna chu na ngaichat lou ahi. Na pachat lou vang uvin na bidoi le na lhunna ding lam na jotna chu akham tang thei pouvin ahi.

Amaho thusei le lasah vang'a Pathen thilgon chu lhunglel ding ahipoi. Na hinkhoa thil dihlou le mihem dihlouho chu ki thinlah in. Adihlouho mapuina le thumopna umlouva jong Pa-

then in na lhonpi thei ahijeh in amaho tobang chu kithinlah in, na boi masang in. Ihinkho le ikimanchahna jouse khat in aboi-pipi jeng'a, eisuhboi jing jeng jong ning kihal um ahi. Thusei na thempoi, na mel ahoipoi, na lhagao mi poi, na mangang poi, na bol theipoi, na hat poi, tiho tahsan hih in. Amaho sei jeh a mihem na hi ahipon, mihem na hi na ding in nang injong ima cha na bol pon, Pathen thilsem khut-semsa nahi. Amahon na changval hinkho, na insung dinmun, na natohna chung'a ima cha tha anei pouve. Nangma chung chang'a thusei lasah koima kikumsah hih in, natoh natham hileh na ngan-seho bou chu thaneina napeh ahin, adang koiman na hinkho tha anei lou ahi.

Jesu Christa heng'a chun mi namkim- Politicians, hou lamkai, ama vetdaho, ama seiseho anacheuvin ahi. Ama natoh le chondanho jouse suhneopeh ding, seisetpeh ding, suh minset ding, suh lungneo ding, anatoh molso sah lou ding chu mihemte deidan ahi. Jesu chu ana suhlung hang nau jong phat phabep akimun ahi. Mitmo mitthei achom ahin, hou lamkai ahilouleh hou natong khat suh lhaset khah le suhlung hang khah ding hi tijat umpen tah ahi. Hou lhacha khat

alunghan thei pet chu aphot pet ahin, ahinlah ahung lhaset khah ding chu eima dinga tijat umpen ahi. David vang chu ana ching lheh jeng in, Pakai thaonusaho chung'a imacha ase ana bol poi. Jesu in ama hina chu mihemho akon hilouva van'a um Pathen akon ahichu aheththem in ahi. John bung 5 achun nangho seiphat le seiphat lou chu keima hinkho ding in imachan apang chompoi ti thudol akimun ahi. Keima phatna ding hihen keima lolhinna ding hijongleh nangho pachat ka ngaichapoi tina ahi. Keima malam ka che theina ding in nangho thuhil le lamkai chule na tosotnau dihloou chu ka ngaicha poi.

Paul chun Philippi houbung mite chun keima hi Christa chamkimna a chu chamkim ka hi ati'n ahi. Eiho hatna a kisong hilouvin, vannoi leiset sempa Pathen chu isung uva cheng ahin, ama in ei sannau chu akinei pou leh vannoi leisetna midang khutsanna le hetpehna chu ngaicha lou hel ahi. Mihem in eipachat uva, ei tilkhon thei uleh hichu thilpha tah ahi. Ahinlah amaho pachat le tilkhouna achu kingap lou ding ahi. Mihem khat in na ngaichat khat na hinpeh lou jeh a nangma hindan chu aphapoi tia aphotchen ahipoi. Akhohpoi, nang

le nang na ki photchen thei ahi. Christa chamkimna a chu nangma le nangma jong chamkimsel nahi. Na hina na kihetna akon na kipa thei ahi. Pathen in akhut tah a na sem na hin, ama lim le mel'a na sem ahin, chule na sung laigil a cheng jouse jong ama semsa ahi. Midang in na hin pachat a khut ahin behpeh ding'u chu athupipen ahipon, Hatchungnung Pathen na sempa in na hinkhoa khut abeh thei ding bou chu athupipen ahi. Kaisangna hi mihem akon ahipon, Pathen akon ahi. Pathen in midang pang louhel a jong nangma ding'a thilpha abol jing thei ahi.

Mi jouse toh kichamdel a um chule tohkhom ding chu athupi pen khat ahin, ahinlah nang in na tep jouva jong anop lou uleh nang na mang pon ama joh mang ahi. Na hinkho le natoh ding phaten kivet inlang Pathen toh kilhon khom in, midangho vang na lhunna ding'a ngaichat pen ahipouve. Na mailam hinkho nang toh pangkhom ding le nangtoh kilhon khom ding mi pha tamtah ana kigol sa um thei ahi. Khatvei komleh mihemten eiho peh ding anei lou jeh un imacha eipe thei ji pouvin ahi. Hicheho tobang ahitengleh eipethei louho chu dalhah a eipe theipa Pathen kom a che ding ahi. Na nu le na pa, na u na nao,

loi le gol chule lamkaite in na hin khoisah cheh unte, ahinlah na ngaichat jouse amahon ape thei pouve. Na ngaichat jouse pe thei chu Pathen bou ahi. Mihem khat akon ngaichat khohtah na neiya ama jeng abou na ki ngai leh amachun na lhunna ding le na lamjot dan akanchah ding ahitai, ajeh chu ama louva ima na bol theilou ding ahitai. Ijem tia mihem dang akon imacha na mu lou tah jongleh Pathen in vang nangma ding in kimsel in akoi in ahi.

Koimacha jeh a hing na hipoi, Pathen in na chung chang avelhi jing in chule na thilphabolho jouse abonchan amelchih jing in, Pathen jal'a hing thei nahi. Tutua jong na hinkhoho hi mihem dang in na tuhchah maithei ahitai. Mihem dang in, na suh minset maithei u ahitai. Mihem dangin na chaideh maithei ahitai. Ahinlah Pathen koma che leuhen, Pathen in alejatja in thil asempha thei in ahi. Midangho hinkho a khun na ngaichat themkhat bou aumin ahi. Ahin na ngaichat jouse chu amahon na hinpe thei pouvin ahi. Na hinpeh theiyu thil um jongleh na hinpeh lou thei nalai u ahi. Na thuseina ajong mi pachat ding bou gel hih in. Mi pachat ding deina Sermon bol lou ding ahi. Mi pachat ding deina a mission na toh lou

ding ahi. Mi pachat ding deina a sum hol lou ding ahi. Mi pachat ding deina a taona man lou ding ahi. Hitia chu na bol leh min na pachat lou tengleh na lhahsam khah ding ahi. Lhahsam chu khat ahin, ahinlah na hin pahcha louho chu na seiset pan ding ahitai. Na lolhinna atam chan a kimaitopi ding, na hin su ding tam cheh cheh ding ahi.

Mihem a na kingai jing laisea, Pathen in na toh sah nom chu na kimoh mudoh thei lou dingahi. Na natoh na thilbol, na thu sei na lasah hechenset Pathen aum in ahi. Ajeh pipen tah chu hiche leiset hinkho akichai tengleh miho angunga na chungthu na kisei a na thu kitan ding ahipon, Pathen angunga na din a ama in na thu atan ding bou ahi.

Pathen angung idin teng uleh – Pathen in, ‘mi na kisasahna em,’ ‘mi pachat a na um nah em,’ ‘midanghon na tosot nah uvem,’ ti thudoh bol ponte, amavang ‘na hinkho a toh dinga ka peh bidoi, na mopohna chu na suhbulhit hinam,’ ahinti ding ahi. Mihem’a kingai louva Pathen’a na kingai leh na lhagao hinkho hoicheh cheh ding ahi. Thutan Vaihomho bung 7 achun Gideon chun mi galsat ding in tamtah angaicha poi, thudih thu tah le lamdihtah a natong dingho, mi lhomcha

bou toh gal ajou in ahi. Angaicha louho, mi suboi thei bepho chu, amaho umlouva jong gal jona Pathen in apeh thei ahi. Mihem a na kingai lhom chan a Pathen lam a na machal ding ahi. Mi lhom jongleh Pathen toh kilhonkhom’a natohna chu ahindou tamtah um jongleh lolhing tei tei ding ahi.

Pathen toh lhon khom hi atamjo toh lhonkhom akihin ahi. Na kimaitopi ding sepai jouse sang in nang lang’a pang Pathen chu ahatjon ahi. Min na tosot lou jeh’a na lung neo mai thei ahi. Mi hon nana bol phatna bang uva na hinbol phat kit tah lou jeh uva na lhahsam em? Na hina, na kipana, na lolhinna, na kholjinna, na huh-hingna chule na mailam hinkho jouse hi Pathen le nang kikh thu ahin, midang kikumsah hih in. Chule nang jong midang hinkho, insung le natohna ijakaiya kiha kum hih in, Pathen le ama kikh thu ahi.

Kipumkhat lou ding tina ahipoi, kipa chat lou ding tina ahipoi, kiloi khom lou ding tina ahipoi, kithokhom lou ding tina ahipoi, ahinlah ihinkho man dan, ikipana, imailam hinkho hi mihem’a kingai louva Pathen a kisel ding tina joh ahi. Pathen’a kisel cheh a Pathen’a kingam cheh a, hangsan tah’a Pakai toh kilhon khom thei ding in Pathen in phatthei eibouh cheh tauhen!

February Thuchinbu

February 10: Office munna Secretary/Coordinator alui le kikhut-khelna February 10 (Monday) nikho in KBC Chapel Hall munah Pathen angung'a Rev. Tonglet Haokip, President, KBC le Pu Jamlal Zou, Vice President, KBC angung'ah kikhutkhelna ana neitauvin ahi.

February 11: KBC Chapel Hall ah KBC Workers hon Prayer Fellowship lolhing tah in ana kimang khom uvin ahi.

February 17: Pentannial Fellowship Planning Committee in Gambih No. 21 a Gambih Executives ho toh amun amol agavekhom uvin ahi.

February 17: C. Molbem, KBC Gambih No. 21 Haosapu in KBC ding'a Taona Mol khat pehdoh ding ngaitona anei toh Ihon in KBC President le General Secretary makaina in Office Secretary jouse in agam umdan le amol lupdan vetlhahna aga nei uvin ahi.

February 18: KBC Chapel Hall a CEC Emergency Meeting touk-homna ana um in ahi.

February 18-20: CBCNEI Fist Mission Conference, MBC Centre Church mun'ah KBC Office Secretary phabep le Mission Board Member-ho in pan analakhom uvin ahi.

February 20: Kuki Baptist Association (KBA), Nagaland Executive member cheng in KBC Office mun vilna ana nei uvin ahi. KBC General Secretary in lemna thu aseitoh Ihon in ngailut thilpeh khat cheh ana kipe in, maban'a kithokhom ding dan phabep jong ngaidanho ana kigelkhom in ahi.

February 25: KBC Secretary jouse MBC Emergency Council, MBC Centre Church muna'h aga kal song uvin ahi.

February 26: Pu Thangmang, EFFICOR in KBC Office vilna ahung neiyin, chadon khomna le kijahmatna ana kineiyn, mailam'a Development thua kalson ding danho jong gelkhomna ana um in ahi.

February 27: KBC Chapel Hall mun'ah Pentannial Fellowship Planning Committee meeting toukhomna ana um in ahi.

February 28: KBC Office Secretary jouse le Office Staff jouse in Office compound sung'a toh thei thei ana tong khom uvin ahi.

Mission Column

*Rev. Lamkeng Lhouvum
Secretary Mission*

Mission Thudol Hetna

1. Arunachal Mission Field a lhaseh last Friday sehleh Fasting Prayer kinei jing chu tuni chan in amachal jing in ahi.
2. Arunachal Mission Field a Evan. Lalboi Kipgen le insung mite in Cottage Meeting anei jingnau amachal jing uvin ahi.
3. Lonpi Baptist Church, Gambih No.21 Houbung in tukum apat Tripura Missionary mi khat(1) lhaseh a Rs.15,000/- a pan la ding'a ahung kiphaldohnau chung'a kipa thu akiphong'e.
4. February 22 le 23 nikho in Mission Board in Gurkha/Nepali B/C Chakpi Molbem vilna anakineiyin, Serou Baptist Church mun ah Holy Bible hopdohna jong akineiyin ahi.
5. Pi Nengja Khongsai Lonpi Khunnou Baptist Church in Convention a Mission tosotna dinga lhaseh'a Rs.500/- a pan la ding'a ahung kiphaldohna chung'a kipa thu akiphong'e.
6. Pi Chongboi Haokip Lonpi Khunnou haosapi leh Insung mite'n Elijah Taona Mol, Gothol mun'a Taona Cabin khat sa ding'a ahung kiphaldohnau chung'a kipa thu akiphong'e.
7. Tezu Arunachal mission Field, Tabitha Girls Hostel a umho in February 29, 2020 nikho in Sports Day ana mang uvin ahi.
8. Langol a um Evan. Hemlun Haokip le insungmite Mission sponsore na ding'a lhaseh a Rs. 2,000 a kiphaldohna ahinneinau chung'a kipa thu iphong uve.
9. Rev. Dr. Thangboi Chongloi Mission Secy. ana hilai in Pi Lhingboi Chongloi A.E. Electricity kom'a Taona Mol Gothol'a Transformer eikoi peh un tia anasei akonin Pi Lhingboi A.E. in ahin boi in Pathen lungsetna jal in imu taovin ahi. Hiche natoh hi Pu Birjit, A.E. Moirang le aloi hon ahin boipiu ahi. Gothol Haosa, Pu Hillun Haokip in Taona Mol gam eipehnau ban'a V.A. member cheng injong nasatah'a eitosot u ahi. Gothol Head Deacon, Pu Hegin Haokip leh atohkhompi Board of Deacon-hon aboilai jouse eina boipiuv in Gambih No.8 Chairman leh Secretary Care Taker, Pu Jillun Haokip leh aloinu in jong ajochan lhon in pan ana la lhon in ahi. Pathen in pan ana la jouse phatthei boh cheh tauhen!

Men Column

*Rev. Tongmang Haokip
Secretary Men Department*

Men Department Thudol Hetna

1. Pathen phatsahna le KBC kivaihomna, Evaluation-ho tohgon dungjui in achesa 10th February 2020 (Monday) nikho in Men Department Secretary lui, Rev. Kaikhokam Chongloi le athahpa, Rev. Tongmang Haokip in kikhutkhelna ana nei Ihon tai. Hiche toh kilhonna muntin le houbung tinna khanglai le mipite jouse in Men Secretary thahpa kithopi cheh a taona toh thoa tosot jing ding in tem ihiuvin ahi.

2. 24th February (Monday) nikho in Men Work Committee Meeting anakineikhom in chule Rev. Thongkhonun Touthang, Finance Secretary, KBC jaona in LoM Resource Center villhahna jong ana kineiyin ahi.

3. 39th Men Department Annual Assembly a anakiphatsah bang'a 2020 a Pate ikiloikhomnauva mipa khat in Member Fund Rs. 100 (Chengjakhat) chule Lom Resource Center mun'a natohna ding'a Rs 100 (Chengjakhat), agomma Rs 200 cheh pehdin'g'a kiphat bang'a Pakai natohkhomna machal theina ding'a hin mapeh cheh ding in tem ihiuve.

4. Men Work Committee (24th Feb. meeting) phatsah dungjuiya tukum Pate Nikho le LoM Resource Centre Day hi ahithe channa Office lang'a kon Speaker gontoh'a Houbung tin'a solna theichanna hung kisol ding ahitoh kilhonna koitabong ama Gambih'a hihenlang Gambih dang'a deichomma kouding nei aumjungle kimahet to ding in temna le hetsahna ahung kineiyie.



Men Work committee le Finance Secretary in LRC visit agabolnau

Women Column

*Mrs. Tinkholhing Haokip
Secretary Mission*

Women Department Thudol Hetna

1. February 2, 2020 nikho in B. Vengnom Centre Church Pastor-pa lamkaina in nute in Lydia Resource Center a um chapangho vilna le tilkhouna chule thilpeh jat chom chom (Anchang 125 Kgs le Rs. 3,300/-)ahung nei uvin ahi. Amaho jal in Pathen thangvahna ipeuvin ahi.

2. Lydia Girls Boarding: KBC Women Department mopohna noiya um Lydia Girls Boarding, Churachandpur a lekhasim chapangho koi pan thei ahikit tai. High School, Secondary le College kaiho chule Accelerate le Conflate Academy a Coaching la ho ding'a jong mun kilem pen khat ahi. Hiche Boarding mun'a umho hi Pathen thua jong tilkhouna nasatah kineiya chule taokhomna le chonchan pha tamtah kihil jing ahin, Boarding Fee jong mundang'a sang'a lhom jep a kibol ahi. Seat 20 bou a ong in ahung masa kila masa ding ahi.

– Contact Pi Lhingbem Haokip (8119939415)



Youth Column

Rev. Seiboi Tuboi
Secretary Youth

Youth Department Thudol Hetna (Youth with a Vision)

1. Lhagao lam'a kikhelna dia lungtup nei tei tei ding
2. Hinkho ase sese khella hinkho dih tah man doh tei tei ding
3. Thilpha habol'a bol'a Pathen phatthei boh nathei dia hinkho man ding
4. Tup le doi kicheh tah'a neiya Pathen'a kilha'n doh pi jing ding
5. Lekha jong hasim'a sim'a Pathen jong ha houva houding
6. Ichung'aho thu man ding apha lam'a thu kisan ding
7. Vannoi chonsetnaho dalhah ding Pathen bel jing ding
8. Pathen houna'a kipha lam louva lunglutna le ngailutna neitah'a hou joh ding
9. Na jong hatoh'a toh'a Pathen jong ha houva houding
10. Pathen vahchoila sah thanop jing ding, Houbung Revival lhunsah ding

Flex Printer: Lamkai masa Former Youth Secretary Rev. Satminlen le tohkhompi lamkai cheng in Youth-te gouthil ding'a ana lamdoh'u Flex Printer chu tulha March'a kon phatah'a iche jom pi kit thei na-diu vin tohgon akisem in hicheto kilhon in muntin na toh khompi Youth lamkai chengle sopi ule naote injong pan nahin lah uva i-houbungsung- uva Programme-ho hihen lang changval le kin le dong jat chom chom'a Programme-hoa hijong le, amun agam lat le anai ja velouva eiho Banner sem nading pou pou aum le KBC Youth Department Flex Printer mun nahin lhut soh kei diu vin tem na ka hin nei jin ahi. Chule mun dang sang'a jong aman nem jep'a kibol ding ahi. Nangma hung louva jong Order nahin bol'a, sum le pai nahin thot pou le gari-ho jong hinpoh sah jeng thei ahi.

REPORT: Kuki Baptist Convention kivaihomnau dungjui le Evalution Committee Transfor and Posting order dungjujin Youth Department Secretary aluipa, Rev. Satminlen Khongsai le athahpa Rev. Lunkhosei Tuboi in 10/02/2020 (Monday) nikho in KBC Office a Youth Secretary kikhutkhelna ana nei lhon tai. Hiche toh kilhonna muntin le houbung tinna khanglai le mipite jouse in Youth Secretary thahpa kithopi cheh a taona toh thoa tosot jing ding in tem ihiuvin ahi.

Literature & Music Column

Rev. T. Thangkhosei Haokip
Secretary Literature & Music

Literature le Music Thudol Hetna

Literature- KBC Diary hi aphot hom'a na kijoh doh thei tahlou jeh in johdoh lou tampi aum tan hijeh chun tua pat'a Houbung miten Dk. 50/- a ikichoh uva asung'a hetding'a lomho jong ihetthei diuvin temna ahung kineiye. Hiche dairy Kolkata a mantam tah le hoitah a kitem ahin Diary titah louva Song Note le thil dang dang jihlutna ding'a jong phatah ahi.

CENTRAL CHOIR A DIA KOUNA

Music Committee meeting Resolution no.04/ MC M-01/2020 dungui'a Choir member lahbe ding a seilnah ahi tolhonna anoiya bang'a hi Choir member Gambih'a le Centre Church'a lahbe ding kouna ahung kinei'e.

- * *Mi Lah ding jat : Mi Nga (5) Pasal 2 Numei 3 hiding ahi.*
- * *Form Last Submission : April 14, 2020 Tuesday.*
- * *Concern Gb./C.C Pastor Seiphatna Lekha.*
- * *Bio-data Lhingsel ding.*
- * *Amachu English Pao (Sappao) tho thei beh hitei tei ding.*
- * *Ama Commitment leh Testimony Lekha ahin kipoh ding.*
- * *Church Choir leh Gambih Choir a pangsa ho deisah ahi.*
- * *Date of interview : 17 April, 2020, at KBC Office.*

KBC(I) SUNG'A LAPI CHOP KHOM DING

Music Committee meeting Resolution no.02/MC M-01/2020 na a KBC hop sung'a Gambih hihen, Centre Church hihen, Local Churches hijong le Music Committee tohgon dungui'a KBC(I) kiphu tilla pat tuni changei'a hung ki sundoh Lapi jouse Labu'a Compile boldoh tei ding aki gong in, hiche tolhon chun koi hijongle noiya kipe condition dungui'a hi ahinpeh cheh diuva hetsah le tem ihuive.

1. Lapi ho hi khomin le Houbung min jaolou bou lah ding ahi.
I hamtia ajaokhah tah jong le Lapi nei ho phalna dungui'a suhtoh thei hi ding ahi.
2. Lapi hi Jubilee, Good Friday, Easter Sunday, Christmas, New Year, Church Dedication, chule hitobang phatbih dungui'a la ho hi ding ahi. Hetthem na aumtah lou jong le lamkai ho toh kihetto

thei ahi.

2. Lapi hi Gambih'a, Centre Church'a chule Local churches hoa hi ding ahi.
3. Lapi jousea Composer/Lyricist/Tune ho min jao tei tei ding ahi.
4. Lapi jouse Sol-fa'a hin thah cheh ding ahin chule soft copy or hard copy khat pen penna ihinthah diu ahi.
5. La jouse ihinsuhtoh chai teng ule Rev. T. Thangkhosei Haokip, Music Secretary le Haoneo Baite, Music Director pa komma ithah lut diuvin iki temchek uve.
6. Lapi jouse April last week sung changei'a ihin thah thei diu ahi. Phat kichai'a hinthah aumle ki sang talou ding ahi.

Pathen lenggam na itoh na diuva Chungmang Pathen in ei Ihonpi jing tauhen.

Reports

Centre Church Thudol Hetna

1. January 24, 2020 nikho in B. Vengnom Centre Church Building le asung'a manchah ding phabep thensona le hondohna ana kinei tai. Rev. Dr. M. Thongkhosei Haokip, General Secretary, KBC in Houin hondohna aneyin, Rev. Tonglet Haokip, President, KBC in Sovenir hondohna aneyin, Rev. Letpu Kipgen, Finance Secreatay, KBC in Washroom hondohna aneyin chule Rev. Tunlal Haokip, Church Pastor in Church Hall hondohna ana neiyin ahi. Hiche houin sahna ahin kum 9 alut in chule Rs. 3, 43, 50,548 akisumang in ahi.
2. February 11, 2020 nikho in Centre Church Salem Village Sapormaina Women Department le Youth Department Golden Jubilee lolhing tah in ana kimang tan ahi. Rev. Dr. M. Thongkhosei Haokip, General Secretary, KBC speaker in ana pang in, Rev. Ngulpao Haokip, Pastor, Centre Church Salem Village Sapormaina in Women Department Jubilee song hondona aneyin chule Pastor Khuptinlal Hangshing, Pastor, KBC No. 4 in Youth Department Jubilee song hondona aneyin ahi.
3. Achesa nisim 29th February 2020 nikho in KBC Gambih No.11 a Centre Church Sangaikot Nute in P.Khomunnom Baptist Church vilna le Pathen houkhomna ana neikhom uvin ahi. Pastor

Tingoulén Haokip, Pastor, Centre Church Sangaikot in Pathen thua tilkhouna ana neiyin ahi.

(‘Centre Church Thudol Hetna’ kiti hi lha lhun sehleh Centre Church-ho kimanchahna le mailam kin khoh umho tahlangna ding’a hung kibol ahin, Church Pastor le Secretary-ho in thuso ding’a kilomho Mobile Number 9862107393 a Whatsapp a hin thot lut jing thei ahi. Thuso ding hung kithotho jouse aboncha Editorial Board in vetchilna aneiya so thei somo chule semtoh thei thei ahin semtoh ding’u ahi. Chule so ding’a hung kithotho hung ksio ding ahijeh in ahin thot lou aum’a ahung kiso lou jongleh phamo sah lou in aphai)

Gambih Thudol Hetna

1. 17th January, 2020 nikho in Khengjoi Baptist Church, KBC Gambih No. 13 in Golden Jubilee lolhing tah in ana mangkhom tauvin ahi. Rev. Dr. M. Thongkhosei Haokip, General Secretary, KBC in thempu dinmun anala in ahi.

2. February 22 nikho in Gambih No. 21, 11, 12 Executives Member jouse in Pentannial Feloowship kimanna ding’a amun umna ding thudol’a Joint Meeting ana neikhom uvin ahi.

3. February 28 nikho in Kangpokpi District a um Kholen houbung chu KBC Gambih No. 5 a lahlutna Rev. Letpu Kipgen, Pastor Centre Church, Kangpokpi thempu hina in ana kinei tai.

4. February 28 Senam Baptist Church, KBC No.16 a pu (L) Tongkholun Haokip Memorial Hall Pastor Thangkhomang Haokip, Gambih Pastor in thenso na anei tai.

5. February 26 – March 1 sung in G. Khonom Baptist Church, KBC No. 11 mun’ah Gl. Haoneo Baite le Gl. Pahang Haokip hilkung hina in Music Training lolhing tah in ana kichai tai.

(‘Gambih Thudol Hetna’ kiti hi lha lhun sehleh Centre Church-ho kimanchahna le mailam kin khoh umho tahlangna ding’a hung kibol ahin, Gambih Pastor le Secretary-ho in thuso ding’a kilomho Mobile Number 9862107393 a Whatsapp a hin thot lut jing thei ahi. Thuso ding hung kithotho jouse aboncha Editorial Board in vetchilna aneiya so thei somo chule semtoh thei thei ahin semtoh ding’u ahi. Chule so ding’a hung kithotho hung ksio ding ahijeh in ahin thot lou aum’a ahung kiso lou jongleh phamo sah lou in aphai)

KUKI CHRISTIAN-HO THUSIM'A AMASAPENHO

(Lhakit leh banjom ding)

1. Manipur gamsung'a Baptist Missionary hunglut masapen chu Pu William Pettigrew ahin 6th February, 1894 nikhoa Manipur khopi Imphal hunglung ahi.
2. Manipur gamsung Lhanglam (South) a Presbyterian Missionary hunglut masapen chu Mr. Watkin Roberts ahin 1910 a Senvon (Tuithang), Pu Kamkholum Singson haosa hina kho ahin Kukite lah'a houbung masapen jong ahi.
3. Pu William Pettigrew Sap Manipur ahung Ihun Jouva Manipur mipite ding'a atoh masah pen chu Moirangkhom mun'a School khat ama min'a aphudoh a "Pettigrew Lower Primary School" abol chu ahi.
4. Pu William Pettigrew natoh suhtangpeh/ suhboipeh'a Manipur phai-cham adalhahna ding'a thupeh (order) bol masapen chu Pu Major Maxwell, chuche lai a Political Agent anahi.
6. Manipur thinglhang gam'a Baptist Church kiphutdoh masapen chu Manipur sahlam (North) a Tangkhul khopi Ukhrol mun a 1902 a ana kiphutdoh chu ahin, Pu William Pettigrew ding'a jong tohga masapen anahitai.
7. Dr. Galen George Crozier (GG Crozier) le aloinu Mrs. Mabel Borsworth Crozier te nupa Manipur ahunglhun masatna pen Ihon chu Vannoi Gallen khat (1st World War) 1917 kum ahin tohga masapen chu Kangpokpi Mission Center anaphudoh Ihon chu ahi.
8. Manipur Baptist Christians lah'a khoppi (Association) kiboldoh masapen chu Manipur Christian Association (MCA) anahin 1928 kum a Manipur Baptist Convention tia anakikheldoh ahi.
9. Manipur lhanglam (South) a khoppi (Association) kiboldoh masapen chu Indo-Burma Thadou Kuki Pioneer Mission (IBTKPM) ahin hichu khonung'a "Indo-Burma Pioneer Mission" (IBPM) le "North East General Mission" (NEIGM) chule Evangelical Christian Churches of India (ECCI) tia hung hung kikhel toupeh ahi.
10. Manipur lhanglam (South) lam'a Welsh Presbyterian dan dungjuija kiphutdoh Houbung chu Senvon Houbung ahin, hiche hi Lhangam Gamkaija Welsh Mission'a ding le Kuki pumpia ding'a Houbung kiphutdoh masapen ahita.
11. Kuki Baptist Christians lah'a Baptist Houbung kiphutdoh masapen chu Tujangvaichong ahin 12 December, 1914 nikho a Rev. U.M. Fox lamkainaa ana kiphutdoh ahin Kuki te lah'a Baptist Houbung masapen ahitai.

DAMMONA KILALASON THEIHO AKON KIVEN DING DAN

1. Dammona kilason theiho akon kivenna ding in itobang natnaho chu kilason theiham chule eti kilason thei ham het angai masape'n e.
2. Natnaho chu ama nat na hit dungjuia kiven na jong um ahi. Vetsahna in HIV natna hi akilason thei hijongleh Syringe mang kop lou ding chule thisan kitimat lou ding ahi. Uithah (scabies) natna neiho toh von kikop lou ding ahi. Chule tahsa kisutheng jing ding ahi.
3. Dammona kilason thei ijat hamkhat hi kivenna lou (vaccination) akibol leh akihoidoh theiyin ahi. Ahinlah HIV natna vang tuni chan'a kivendohna thei louleai (vaccine) kisemdoh loulai ahi.
4. Tu le tua kisei gimnei le vannoi hotling sohheh Corona Virus kiti jong hi akivendohna ding loileai (vaccine) kisemdoh lou lai ahi.
 - *Corona Virus hi akivendohna thei loileai kisemdoh hih lai jongleh mihem in eima le eima hetna le kichih theina akon in akikiveng thei in ahi.*
 - *Twi le Sabon ahilouleh khutsop thengna ding'a kitem louleai a khut kisop theng jing ding ahi.*
 - *Corona Virus natna le akilason thei natna nei aumleh ama chu kiven ding ahin, achit ham akhut ham tengleh amuh chu ulthepon ahilouleh akhut a akitom ding, achil hihen, ulthepon hileh apaimang ding tengleh nenkholna mun'a kitup tah'aapai mang ding ahi. Nen bo apanghon jong khut tom akitom jing ding u ahi.*
 - *Insung'ho jong bangkot (window) hon jing ding, ahithe channa nisa vah kholut sah ding ahi.*
 - *Insung'a thil le lo kineiho (Furniture) hihen lang Computer le Mobile Phone hijongleh twi sehseh hilouva natna hit that theihoa suhtheng jing ding ahi.*
 - *Natna neiho in muhtom (mask) kitom jing ding ahi. Adamho injong adammoho ajen teng uleh muhtom akitom ding'u ahin, hichu muhtomho chu khatvei kal val man lou in aphan, iman chai tengleh kituptah a nenkholna a pai ding ahi.*
 - *Sarkal (Govtment) in bol ding'a thupeh (kivenna ding'a guide line abolho) jui ding ahi.*
6. Dammona kilason theihoa kon kivendohna ding'a Pathen heng'a tao jing ding ahi. Chule tahsa natna sehseh hilouva chonset natnaho akon'a jong kiven jing ding ahi.

~Dr. Paokai Kipgen, RIMS, Imphal

TAHSA DAMMO TAONA LE KITHOPINA NGAICHA

Gl. Jangkhogin Haokip, Molnom, KBC Gambih No. 16, Tegnoupal District in 13th August, 2019 nikho in Gari Accident anatoh in khohelouva aum pet in Jivan Hospital Kakching mun ana kilhut in, Raj Medicity, Imphal'a phat sottah akijen kit in chujouvin RIMS Hospital mun alhung kit in lhagup (6 Months) tobang Hospital um ahitan, sum-le-pai chuleh phat tampi sumang in a'insung miten anaboipi uvin tuchan injong phatdomna (improvement) aum theipon ahi. Amahi alhoh (Brain) a thisan chang ahi'n tuchan'a kihoupi theijong hiloulai ahi. Inchen hahsa genthei insung ahijeh in munchom gamdang'a pohding jong sum-le-pai umlou jeh in imacha deibang in aumjoupon, hijehchun hiche KBC Thuso mangchan muntin'a um loilepai chuleh nule pate hon Pathen heng'a taona inei peh uva chule sumlepaia panla thei thei injong ijo kham kham uva ikithopi thei u ahi. *(Tuletua aumna RIMS Surgery Ward C/4. Contact No.6909013059 Pu. Hemlet (Apa). SBI A/C No.34503575283. IFSC Code. SBIN0009990).*

('Tahsa Dammo' kiti hi KBC sung ahilouleh Christian sung'a taopehna le kithopina ngaichaho tahlagna ding'a hung kisem ahi. Hichea taona ngaichaho in Jt. Editor Mobile Number 9862107393 a Whatsapp a hin thot lut jing thei ahi. Ahung kithotho chacha hung kiso ding ahitoh lhon in taona ngaicha ihet hou thot lut cheh ute.)

LHAGAO HINKHO PUI HING THEI THUGOLHO

1. Hinkho kiti hi leisetna Exam lahlah'a ahahsape'n ahi. Leisetna themvetna Exam'a mijouse Question Paper akibang cheh in, amavang mihem hinkho Exam vang Question Paper chom cheh eikipeuvin ahi.
2. Hospital'a ECG (Electrocardiogam – lungphut dan vetna) ikilah teng uleh line asuh atung in akilhung in ahi. Hiche

line khu jangpet'a ahung um tengleh mihem hinna chu um talou tina ahi. Leiset mihemte ding'a hinkhoa kimaitopi le lamjotna ahsahsa asuh atung aum lou leh imacha bol lou, athisa tobang na hinkho tina ahi.

3. Mi jouse'n lolhinna dingin hansanna anei cheh in ahi, ahinlah losapna ding'a jong hansanna nei angaiyin ahi. Tuni channa na losapna aumlou lai leh midang sang'a chungnungjo na natoh lou lai ahi.
4. Tup neilouva thanopna neihon lhunna ding kicheh anei jou lou ding'u ahi. Nitin'a na lhunna ding, lha she'a na lhunna ding, kum sung'a na lhunna ding chule na hinkhoa na lhunna ding lungtup neiyin.
5. Thil tamtah na bol jeh'a thil tamtah na joutai tina hilou ahin chule nangma toh ding hilou na (work) natoh leh na kipapi louhel ding ahi.
6. Na boltheina le na natoh theina chu na man chah pou leh na tohna gam le mun kikhel jongleh na natohna mun'a na lolhin ding ahi.
7. Na Title bouva na natoh leh na tohna mun akikhel tengleh imacha na bol thei tahlou ding ahi. Nangma'n na toh ding'a lom natoh (mission) na toh tengleh nanatohna na min (title) jong na haimil leu ding ahi.
8. Israelte chu Pathen in ana umpi jeh uva phaicham hihen thinglhang hileh galjona ana nei bang uva na hinkhoa Pa-then umpina na chan leh thinglhang hileh phaicham hileh na natohna (mission) chu na lolhin ding ahi.
9. Mi hon na natoh ahin vet uva ahin pachat nalaitah ule aphatchompi nalaitah uchu nang ding'a nanatohna ding mun hoipen le dihpén ahi.
10. Na phat man dan na kisemtup masang in na lungtup kisemtup masat in. Na lungtup akitup lou leh na phat man dan kitup jou lou ding ahi.

Thuso Thudol'a Hetsahna

February 26, 2020 nikhoa KBC Thuso Editorial Board kiphat-sahna dungjuiyin Thuso hi nasatah'a semhoibe ding akigel toh Ihon in houbung mite tosotna nasatah in akingaicha in ahi. Lhaseh Thuso thua het ding'a phaho:

- *Editorial umjing ding a ahin, Article khat le sermon ni umjing ding ahi.*
- *Cover tilou Thuso asung (content) a picture (lim) kiha jaosah talou ding ahi.*
- *Thuso sung'a Department-ho thudol, Centre Church-ho thudol, Gambih-ho thudol hetna ding mun akipe in, ama ama dinmun'a thuso sonomho in lha jousea nisim 1 (Date 1) a Jt. Editor kom'a pehlut cheh ding ahi. Whatsapp a penomho in 9862107393 a thot thei hiding ahi.*
- *Article hihen Sermon hijongleh chule tahsa le lhagaova machalpi thei le phatchompi theiho hin sun nom jouse in asut thei cheh ahi. Ahung kisun jouse chu sotei tei ding tina hijeng louva Editorial Board in vetchilna aneiya angaichat leh edit jong abol thei ding'u ahi. Whatsapp a penomho in 9862107393 a thot thei hiding ahi.*
- *Article, Sermon, Report le adang dang hin sun jouse in ahithe channa soft copy a hin thot ding ahin chule ahithe channa spelling hihen thuche dan hileh semtupsa cheh a hinpeh ding ahi. Thu kisun jouse adihna hihen adihlouna hileh asunho mopohna hiding ahin, Editorial Board mopohna hilou ding ahi.*
- *Thuso hi houbung mite in atam theipen'a sim ding akidei toh Ihon'a member-hon ilah cheh ding uva tem ihuue. Chule houbungho a Department jouse jong copy hung kithot cheh ding ahin kipah tah a ana sim cheh ding'a tem ihuue.*

-Jt. Editor

OFFICE SECRETARY-HO

KIKHUTKHELNA ANA UM

67th KBC General Assembly Evaluation Committee Recommendation No. 7 a kisei dungjuiyin KBC worker-ho phabep natohnmun kikhelna ana um in ahi. Hiche akikhelho chu aphaat le amun toh kitoh in ama ama mopohna le tohmun ana jop cheh tauvin ahi. Amaho jouse chungchon in Office munna Secretary/Coordinator alui le kikhutkhelna February 10 (Monday) nikho in KBC Chapel Hall munah Pathen angung'a Rev. Tonglet Haokip, President, KBC le Pu Jamlal Zou, Vice President, KBC angung'ah kikhutkhelna ana neitauvin ahi.

Mopohna

Finance Secy.

Mission Secy.

Men Secy.

Women Secy.

Youth Secy.

Litt. Secy.

Dev. Coordinator

Lamkai Luiho

Rev. Letpu Kipgen

Rev. Henjalen Dounel

Rev. Kaikhokam Chongloi

Pi Lhingbem Haokip

Rev. Satminlen Khongsai

Rev. Paokhohao Haokip

Rev. Henkholen Kipgen

Lamkai Thahho

Rev. Thongkholun Touthang

Rev. Lamkeng Lhouvum

Rev. Tongmang Haokip

Ng. Lhingboi Kipgen (to be)

Rev. Lunkhosei Tuboi

Rev. T. Thangkhousei Haokip

Rev. Onkho Haokip

G. GELBUNG BAPTIST YOUTH DEPARTMENT

KBC GAMBIH NO. 4 GOLDEN JUBILEE

G. Gelbung khomun hi Pathen 1962 kum anatun dohsa ahitoh kilhon in Baptist Youth Fellowship (tuhiin Department akiti tan) hi Pakai kumsem 1970 kum a Pu. Sonlet Haokip lamkai na a Pute pate hon ana phudoh u ahi. Hichu tukum 2020 kum a kum 50 Ihinna Jaanglum Soung kitung chuleh Sel chal Nao 4 khat leh Vohchal tuh 5 a Golden Jubilee chu ana kilom ahi. Pu. Rev. Paolun Haokip Pastor C/C Canaan Veng CCpur in Jubilee programme eina thenso peh uvin, Pu Dr. Rev. M. Thongkhosei Haokip G/S KBC I in Jubilee Soung hondoh naleh thenso na eina neipeh uvin, Pu. Rev. Demkhoneh Retrd Pastor KBC in Thupi "Nakhangdon laiyin nasempa geldoh jingin" eina seipeh uvin chuleh Pastor Khuptinlal Hangshing KBC Gambih No 4 in Souvenir eina thenso peh uvin ahi. Pu. Ngamthang Haokip Hounarable MLA 51 Saitu in jong programme ah houlim najong eine ipeh uvin ahi. Amaho jouse chungah Jubilee Board in kipathu sangtah in ahung kiphong in ahi.

Jubilee Iholhin nading atha le jung chuleh lunggel imajouse a kithopina eihin neipeh hou Houbung mite hojouse nabon chau chungah kipathu seijoulou ahung kiphong in ahi.

Golden Jubilee Board

MANIPUR THEOLOGICAL COLLEGE
Kangpokpi, Manipur
ADMISSION OPEN
FOR
THE ACADEMIC SESSION 2020-2021
COURSES OFFERED

Bachelor of Divinity
Master of Divinity
Master of Theology

Contact : Rev. Dr. Letthang Haokip
Principal, MTC (8132905347)

Shalom Theological Seminary
Sapormeina, Kangpokpi District, Manipur

ADMISSION OPEN
FOR
THE ACADEMIC SESSION 2020-2021
COURSE OFFERED
Bachelor of Theology

CONTACT Rev. Haoneo Haokip
Director STS
9089593092/7005525033

Rate for Advertisement

Half Page

-

Rs. 500/-

Full Page

-

Rs. 1,000/-

Contact : 9862107393



amsung Dual Camera
not with my Galaxy A30

Nagaland KBA Executive in KBC Office ahung vilnau



Khengjoi Baptist Church Golden Jubilee



G. Gelbung Baptist Church Youth Dept. Golden Jubilee

Post Regd. MNP/81
Regd No. 18134/88



February 28, 2020 nikho a Office staff ho jouse in Office compound
mun a na tohkhom na ana kinei in, anneh khom na jong ana kinei
in ahi.

If undelivered, please return to

The Editor. KBC Thuso

KUKI BAPTIST CONVENTION

Opp. DM College, Imphal - 795 001

Contact: 9862633173